

東華續錄

光緒一百七十一

臣朱壽朋敬編

臣章圭琢恭校

十二月癸巳朔諭本月初七日朕恭詣 圖丘告祭初八日祇謁 大社 大穰畝祭先期齋戒三日以

伸誠敬該衙門敬謹預備○諭朕欽奉 慈禧端佑康頤昭豫莊誠壽恭欽獻崇熙皇太后懿旨上年

匪變亂之際禁門以內承日本國士官嚴飭下士兵卒極力保護洵屬睦誼可風深資其爲感悅著該

轉達日本國皇帝申諭日本政府外務大臣調查士官下士官職姓名迅速電覆以便區別等級賞給寶

星○諭興學育才實爲當今急務京師首善之區尤宜加意作養以樹風聲從前所建大學堂應卽切實

舉辦著派張百熙爲管學大臣將學堂一切事宜責成經理務期端正趨嚮造就通才明體達用庶收得

人之效應如何核定章程並著悉心妥議隨時具奏○諭翰林院爲儲才之地平日並無公事從容清暇

正宜博通經濟期爲有用之才以備國家任使著掌院學士將該衙門人員督飭用功於古今政治中西

藝學均應切實講求務令體用兼賅通知時事而無習氣限五箇月後甄別一次由該掌院學士嚴行考

核分別優劣據實奏聞毋稍徇飾○諭兩廣總督陶模奏遵旨飭查廣西學臣劣跡據實覆陳一摺前據

御史黃曾源奏參廣西學政劉家模貪鄙各節當交陶模查辦茲據覆稱該學政嗜好甚深關防不嚴罔知檢束所至之處增索棚規供應並任聽船戶滿載私鹽被緝私廠拿獲該學政謂有衣物寄放在船電請查追一時傳爲笑柄等語學政爲一省師表當如何潔清自矢恪守官箴似此貪劣昭著實屬辜恩負職學政劉家模著卽行革職以示懲儆○甲午諭昨已有旨飭辦京師大學堂並派張百熙爲管學大臣所有從前設立之同文館毋庸隸外務部著卽歸入大學堂一併責成張百熙管理務卽認真整飭以副委任○諭此次賠款載在約章必須如期籌償萬不可稍涉遷延致失大信著各直省將軍督撫務遵照全權戶部會議辦法竭力籌措源源撥解按期應付不准絲毫短欠致生枝節倘或因循貽誤定惟該將軍督撫等是問懷之慎之○諭現值時局大定亟應整頓路礦以開利源著仍派王文韶充督辦路礦大臣加派瞿鴻禨充會辦大臣張翼幫同辦理其關內外鐵路事宜改派袁世凱接收督辦胡燏棻會同辦理務各認真籌畫實事求是以保利權○調李紹芬爲雲南布政使以林紹年爲山西布政使○甘肅新疆布政使文光因病乞休允之○魏光燾奏臣於光緒二十七年八月二十六日具奏滇省粵邊游匪酌擬辦法一摺欽奉 硃批知道了著卽督飭各員認真舉辦毋任日久蔓延爲要欽此仰見 聖主廬念邊陲之至意欽感莫名查原奏聲明滇省軍制苟簡非更定營制酌增行餉無以鼓勵軍心擬俟團營辦

好裁併騰挪專案辦理現在前敵營務處黃鳳岐署廣南府劉鈞均已先後到差到任挑團布置惟覃修綱一軍到邊年餘迄無功效察看終難得力不能不亟籌調換而滇軍積疲零星基布實無全枝勁旅可遣臣自五月到任募立武威六營創練洋操會將省防綏靖各營添設教習棚夫一律改練雖爲時未久昨經校閱步伐尙屬整齊事急需因與撫臣李經羲熟商卽委省防分統調補九江鎮總兵劉萬勝統率綏靖正中左右中四營並駐防邱北之綏靖副中營開赴廣南沿邊接替覃修綱一軍聯團布置以爲遊擊策應雕剿之師復飭前敵營務處黃鳳岐招募一營與劉軍合共六營俾不至過虞單薄並仿照陝西洋操隊大致規模將薪費員額切實核減更定營制酌增餉精以資飽騰均自本年十一月初一日起照章改編起支薪餉行軍仍每棚添設長夫發給棚帳鋤鋤斧略備規制俾得運動較靈可以應敵已飭尅期開拔擬劉軍到邊接防後飭令覃修綱暫回開化鎮總兵署任責成裁併所部綱字各營屆時再行專摺奏辦其劉軍未到以前仍嚴飭覃修綱實力剿辦毋稍鬆懈得 旨著卽督飭認真訓練毋稍懈弛餘依議○乙未以潘效蘇爲甘肅新疆布政使豐紳泰爲甘肅按察使○丙申諭前因御史黃曾源高枏先後奏參福建學政檀璣貪劣各款一摺當經諭令許應駘確查茲據查明覆奏該學政被參納賄得贓各節雖查無實據而去取不公關防不密固已異口同聲劣跡昭著實屬有玷官方檀璣著卽行革職

另片奏檀璣按試臬臬等屬託詞集捐請飭如數交出等語卽著許應騷勒令該學政如數清繳歸入閩省賑捐款下備用不准稍有隱匿○諭朕欽奉 慈禧端佑康頤昭豫莊誠壽恭欽獻崇熙皇太后懿旨國家與列邦講信修睦一秉大公歷年以來召見大小臣工必以請求時務聯絡邦交爲訓勉每於州縣等官必諭以朝廷於教堂教士一視同仁務須加意保護並勸導百姓常使民教相安切勿猜嫌多事此等告誡不啻三令五申乃各該衙門人員能仰體朝廷德意者固不乏人其未能實力奉行亦復不少嗣後務當屏除成見開誠布公擇善而從相接以禮自能中外輯睦共享昇平豈非安上全下之大幸至各省民情不一究竟良懦者多往往有宵小奸徒輾轉煽惑造言生事遂至釀成教案多被株連後悔無及是在地方官平日與民相親隨時開導遇有民教爭訟聽斷持平無偏無激其有傳習邪教如白蓮八卦等名目藉端惑衆本爲法令所不容久已懸爲厲禁務卽申明曉示嚴切稽查有犯必懲以正人心而肅國紀著各該將軍督撫一體遵照辦理將此通諭知之○諭上年拳匪內訌釀成巨禍皆由無識之王大臣縱庇邪術挾制朝廷職爲厲階其罪固無可追而當時愚妄之徒逢迎附和與該王大臣等彼此應議論驚張濟亂觀聽實屬貽害國家雖情節輕重不同要亦難逃洞鑒自應一併懲創以肅官常開缺都察院左副都御史何乃瑩翰林院侍講學士彭清藜編修王龍文江西贛州府知府連文冲陝西補用

知府曾廉均著革職永不敘用○命善耆在御前大臣上行走○命世鐸管理雍和宮事務○許祐身奏
本月初一日 召見科道臣跪聆 天語感激涕零竊以人才之興基於學校恭讀本年八月初二日

上諭令各省書院改設學堂十月間升任山東撫臣袁世凱陳奏東省學堂章程欽奉 諭旨通行仰見

皇太后 皇上勵精圖治深維國家作人之計必先儲之於學堂執兩用中莫名欽佩惟各省自奉

旨後辦理如何尙未據次第奏報實緣籌費爲難未能同時推廣查東西各國學堂之費多者每年至千
萬餘兩少者數百萬兩日本海島之國亦八九百萬兩其籌款之法除由公家發帑外半由民間捐助而
成中國風氣初開學堂成效未著不有鼓舞安能振興溯歷年籌餉海防河工賑捐等事例皆緣經費無
出爲一時權宜之計援例舉行本年七月間欽奉 懿旨永遠停止澄清仕路正所以振拔真才惟值此
帑藏支絀學堂經費籌撥無從無米之炊勢難責之疆吏臣愚以爲籌款稽時徒切喁喁之望何如變通
事例爲剋期興辦之資擬請以學堂捐輸給予獎敘似與疊次 詔書及停捐 懿旨實有並行不悖者
蓋此項出資人員皆仰體 朝廷振興學術教育人才之盛心其急公好義固屬可嘉而明白事理知所
當務尤宜激勵之以爲方來之勸且以民間自有之財力聽民間自行舉辦歸地方官就近核明確數不
必由藩庫上兌及派員設局致多糜費庶有一分之財卽得一分之用 國家推大公無私之意而成敬

教勸學之規官吏有稽察核助之權而絕耗折侵挪之弊揆之情勢當易集事謹擬獎敘章程五條以備
聖明採擇一凡紳商士庶能獨力創建學堂輸資至十萬兩以上者應由該省督撫奏明請 旨破格
錄用以示優異藉以甄拔人才其不及十萬者准照例定十成銀數給獎實官及十成貢監若干人已有
官階不願邀獎者許移獎子弟以免向隅一查封典銜翎本在常捐不停之例此項捐輸學堂人員如已
經得有實官願得封典銜翎應請卽准部定新章核獎一凡現任候補各官捐資學堂者應請照例定十
成銀數給以升階花樣若資非已出係由勸募而來應視欸之多寡分別尋常異常勞績給予獎敘庶効
力者不至偏枯一凡捐助房屋書籍器具及學堂應用格致化學儀器等項請准照市價折合銀數給予
以上獎敘一凡興辦學堂之處所捐銀數及已用數目均令隨時呈明該管地方官立案其在省城者應
由該督撫核明具奏其在府廳州縣及鄉鎮市者應由該地方官核明詳報督撫奏獎以上籌欸各條係
於無可設法之中爲援例變通之計良以舉行新政中外觀瞻非有人才無以興辦名器雖重較之於
國脈則輕創始甚難任之以衆擎則易他日英才輩出共策富強截止之期計之可待固非其他事例可
得援請准行 上諭御史許祐身奏勸立學堂懇請獎勵一摺各項捐輸請獎實官業經諭令永遠停止
該御史請變通事例擬以學堂捐輸給予獎敘實屬自紊其例所請著不准行○薩廉奏俄人在海參崴

創設滿文學堂以教俄童託延墨爾根城鄂倫春協領永善爲教習現已派員署缺飭令前往報關○丁酉蠲免順直通州等八十二州縣錢糧旗租○己亥大祀 天於 圓丘 上親詣行禮○諭張人駿奏查明本年山東各屬秋禾被災情形懇恩分別蠲緩新舊錢漕一摺山東濟南等十府並臨清濟甯直隸州所屬各州縣衛所鹽場因本年陽雨失時秋禾皆多傷損並沿河一帶水衝沙壓堤堰佔挖各地及黃流漫溢被淹村莊若將應徵錢漕照常徵收民力實有未逮加恩著照所請所有被水成災之齊東等州縣所屬各村莊並被水被旱被風被蟲被沙被鹹勘不成災之濟甯等州縣所屬各村莊及堤埝佔壓各地畝均著照勘明被災輕重情形將應徵錢漕等項分別蠲緩以紓民力○庚子祭 社 稷壇 上親詣行禮○壬寅諭朕欽奉 慈禧端佑康頤昭豫莊誠壽恭欽獻崇熙皇太后懿旨元旦令節皇帝率王公百官著在皇極殿行禮○諭朕欽奉 慈禧端佑康頤昭豫莊誠壽恭欽獻崇熙皇太后懿旨禮部奏元旦節儀一摺著照例行禮停止筵宴其在外公主福晉命婦並停止進內行禮餘依議○命直隸總督袁世凱參預政務處○堃岫奏燕郊等處行宮工程緊要請 旨飭交總管內務府趕緊派員查勘辦理得 旨著該衙門派員查勘仍遵前旨力加簡省奏明辦理○癸卯欽奉 慈禧端佑康頤昭豫莊誠壽恭欽獻崇熙皇太后懿旨劉坤一著於明年開河時北行來京陛見張之洞著俟劉坤一回任後來京陛

見○諭陶模等奏據南雄州電稟法國柯教士面稱始興縣屬馬市墟居住民房之如教士不知被何人謀斃並致斃華人一名現尚未據該縣稟報當飭該州協同柯教士馳往查辦等語人命案件該地方官應卽勘驗稟報況事關交涉尤宜迅速辦理此次始興縣屬出有謀斃華洋二名重案該縣並不卽時勘報實屬玩泄著卽撤任先行交部議處並勒限嚴拿兇犯務獲訊明從重懲辦如逾限不獲定將該縣屬加懲處○甲辰李興銳奏江西近年水患頻仍推求其故皆由鄱陽湖日見淤淺而長江又昔寬今狹驟遭大雨疏洩不及便致四溢爲災卽如本年五月江省水災蔓延者四五十縣實則不過連雨十日而已夫十日之雨氣候常有未可諉爲天災也而水利不修患已如此脫遇霖霖匝月豈不徧成澤國何堪設想攷地志鄱陽湖古稱彭蠡闊四十里袤三百里西有章貢之水會南贛寧都吉袁臨瑞諸郡之流爲贛河一千里繞而左穿樵舍吳城入於湖爲西鄱陽湖東有軍峯之水會建撫諸郡之流爲撫河四百里繞而右穿楊家灘趙家圩入於湖爲東鄱陽湖兩湖又北駛百里始混於一爲彭蠡南跨南昌西接南康東抵饒州北達潯陽由湖口以出長江故爲通省水道門戶禹貢治水卽有彭蠡既豬之說其關係緊要可知臣上年赴任適當殘臘水落之時察看湖水有深不盈一尺者湖中沙石積而成洲曲折紆環水性多爲所遏抑商賈帆樯亦以水淺濡滯不能暢行生計日困心竊憂之思欲設法疏濬而工役繁興耗費無

算際此民窮財盡安從得累萬金錢擲諸水濱用是四顧徬徨一籌莫展未幾卽遭五月之水當時委員四出散賑勒限均飭其詳查受患之由確考弭災之策咸謂非濬湖無以出斯民於昏墊臣再四思維與其年年被水歲歲籌賑竭盡官民之力而不能求一日之安誠不如勉籌鉅款大加修治庶幾一勞永逸且湖水淤滯商船不能通行商務亦無從振起是濬湖雖爲防水患起見亦未始非爲興商務張本也八月間奉文停捐實官臣督同司道核計所收籌餉新捐除上年辦理團防及撥付教堂賠款尙有所餘此款前經奏蒙 天恩全數留歸外用雖江省現在舉行新政興學練兵諸大端無一不需鉅款本屬力難兼顧惟濬湖一事既於民生商務均有關係自不得不先其所急臣當飭司道委員赴滬購製挖泥機器輪船數艘乘此時冬晴水淺將全湖淤墊之處分別挑挖其上游河道亦一律擇要疏治顧此時創辦布置粗定卽屆年終仍恐不能竟其全功當期諸來年次第辦理總期逐漸修治盡一分之力卽收一分之效其所需工役費用卽在籌餉捐款內支用不敢動撥正項錢糧得 旨著卽督飭疏濬核實辦理以惠民生○乙巳 上御乾清宮德國使臣穆默英國使臣薩道義法國使臣鮑渥俄國使臣雷薩爾日本國使臣內田康哉大西洋國使臣白朗穀覲見○諭前日召見之新選陝西鳳邠鹽法道鄭思賀奏對顧項人欠明白著卽開缺○丙午 上詣 大高殿祈雪○以蔣良眷爲江南狼山鎮總兵○調倭恆額爲山

海關副都統○丁未以祥年爲正黃旗蒙古副都統○予浙江烏程縣孝女許興寶旌表○戊申予故大學士李鴻章於浙江建祠○安徽壽春鎮總兵郭寶昌卒予祭葬建祠戰功事蹟交國史館立傳○己酉內閣學士徐琪緣事革職○庚戌諭軍機大臣等有人奏陝西郃陽縣知縣徐普巧於鑽營半年之中連調三缺其署韓城時聽斷乖謬玩視人命文生張希鸞家務訟案擅行責罰文生杜某謀殺胞弟案勒令私和該縣因歲荒勸捐將捐事悉交委員州判謝樹棠經管妄作威福擅權納賄並有刑逼斃命之事又候補知縣王榮綬抽收芝川釐金橫徵苛罰興販漁利請飭查辦各等語似此貪劣苛虐如果屬實殊爲地方之害著升允按照所參各節確切查明據實參奏毋稍徇隱原片著鈔給閱看將此諭令知之○諭軍機大臣等有人奏特參屬民害政之知州請飭查辦一摺據稱直隸易州知州馮清泰當上年拳匪之變該州設有城防局防費所需派令閭州鋪戶與富紳交納銀錢足有二十餘萬之數復於今年按戶攤捐勒令交錢非刑威逼並浮收錢糧私受賄託縱容伊子等開設典鋪與民爭利各等語似此貪刻謬妄如果屬實殊爲吏治民生之害著袁世凱按照所參各節確切查明據實參奏毋稍徇隱原摺著鈔給閱看將此諭令知之○以張仁黼署兵部右侍郎○辛亥 上御乾清宮奧國使臣齊幹美國使臣康格德國使臣穆默英國使臣薩道義法國使臣鮑渥俄國使臣雷薩爾日本國使臣內田康哉大西洋國使臣

白朗穀義國署使臣羅瑞納日國署使臣賈思理和國署使臣羅敦比國署使臣賈爾牒覲見○以恭辦回鑾差務出力予隨辦鐵路差使道員王福昌等升敘有差○外務部奏臣部爲交涉總匯之區一切經費勢難過簡從前總署設立之初月支欸項向由戶部關領嗣因用度日繁又設立同文館學生教習薪水等項所費不貲奏請在各海關徵收輪船船鈔項下暨招商局輪船船鈔項下各提三成並船牌費銀兩解交應用以上各欸名爲同文館經費而歷年總署一切用費莫不取給於此收支相抵時形竭蹶本年六月間政務處議覆總理衙門改爲外務部設立專缺摺內聲明外務部既設專官自應優給養廉以資辦公所有各經費即在本衙門應收三成船鈔及罰欸項下開支如有不敷再由出使經費項下撥補等因奉 旨允准欽遵在案現在同文館業經奉 旨歸入大學堂所需經費前由戶部將華俄銀行息欸撥歸應用可以無須另籌嗣後各海關應解三成船鈔罰欸銀兩自應作爲臣部辦公專欸其從前總署月支戶部經費即應停支以清欸目惟查臣部現當改章伊始支應紛繁不獨各堂司養廉繙譯官薪水等項費用較鉅卽如覲見儀節購辦禮物製備寶星一切不時之需在在胥關緊要相應請 旨飭下各省將軍督撫轉飭各關道將應解三成船鈔罰欸銀兩務須按期解交臣部應用其以前欠解銀兩亦須迅卽補解以應急需得 旨允行○壬子諭禮部左侍郎榮惠奏敬舉人才一摺據稱安徽試用道蔡

世昌才具優長歷爲各疆臣所委任等語蔡世昌改官道員本年曾經召見人甚平常該侍郎輒稱爲劉坤一張之洞吳大澂等所任用率意鋪張語多不實似此妄行保薦何以激勵人才榮惠著傳旨申飭○諭錫良奏查明豫省蘭儀考城二縣本年黃河漫溢成災及各屬因風雹旱潦被災請分別蠲緩新舊錢漕開單呈覽一摺河南上年秋冬之交雨雪稀少入春以後被風被旱被淹被雹各屬秋禾受傷收成均形歉薄若將應徵錢漕照常徵收民力實有未逮加恩著照所請所有蘭儀考城兩縣成災五六七八九分各村莊暨勘不成災之河內等六十州縣所屬各村莊均著照勘明被災輕重情形將應徵新舊錢漕分別蠲緩以紓民力○諭張之洞等奏查明湖北各州縣被淹受旱輕重情形懇恩分別蠲緩新舊錢糧一摺湖北黃梅等縣本年五月間暴雨連朝江漢並漲田廬禾稼大半淹沒入秋後雨澤稀少乾早成災若將應徵錢糧照常徵收民力實有未逮加恩著照原奏所開黃梅等各州縣村莊頃畝應蠲應緩銀兩各數分別蠲緩另摺奏黃梅等縣應徵漕糧請分別緩徵等語著照所請緩至二十八年秋後分限帶徵其原限節年漕糧並著遞限一年帶徵以紓民力○癸丑諭軍機大臣等奕謨等奏幫升承運米石捏報搶失請飭查辦一摺據稱西陵官兵應食粟米指撥山東漕糧上年運至雄縣被搶餘米存在滄州等處當卽先後派員密查顯有官弁藉端侵蝕情事請飭直隸督臣山東撫臣遴委委員前往確查等語事

關兵食而押運員弁膽敢乘亂蒙混稟報顯有折價盜賣情事著袁世凱張人駿確切查明參辦嚴追據實覆奏原摺著鈔給閱看將此諭令知之○戶部左侍郎吳樹梅因病乞休允之○甲寅諭朕欽奉 慈禧端佑康頤昭豫莊誠壽恭欽獻崇熙皇太后懿旨大學士榮祿奏瀝陳下情懇請開去各項重要差使一摺該大學士公忠體國謹慎小心久爲朝廷所信任上年拳匪之變衆口紛呶該大學士獨能堅持定見匡扶大局厥功甚偉今雖時事粗定而元氣大傷除弊更新百端待理正當同心戮力共濟艱難宮廷振厲不遑孜孜求治該大學士受恩深重更何忍置身事外獨使宵旰憂勞揆諸鞠躬盡瘁之義於心安乎所請著不准行○諭錫良奏已故知州虧短交代請飭查辦等語河南已故署裕州知州林亮基任內虧短正雜等項一千八百三十餘兩又欠常平穀價三千七百七十餘兩業經奏參革職勒追乃該家屬避匿絲毫未解實屬膽玩著順天府及各直省督撫查拿該故員家屬解豫嚴追並著徐會澧陳璧錫良將該故員原籍家產及歷過任所資財一併嚴密封查備抵以重庫欸餘著照所議辦理○授孫家鼐爲大學士○調楊儒爲戶部左侍郎轉梁仲衡爲工部左侍郎以秦綬章爲工部右侍郎○命瞿鴻禨爲軍機大臣○蠲免安徽泗州等三十八州縣錢糧○乙卯諭朕欽奉 慈禧端佑康頤昭豫莊誠壽恭欽獻崇熙皇太后懿旨我朝深仁厚澤淪浹實區滿漢臣民朝廷從無歧視惟舊例不通婚姻原因入關之初

風俗語言或多未喻是以著爲禁令今則風同道一已歷二百餘年自應俯順人情開除此禁所有滿漢官民人等著准其彼此結婚毋庸拘泥至漢人婦女率多纏足由來已久有傷造物之和嗣後搢紳之家務當婉切勸導使之家喻戶曉以期漸除積習斷不准官吏胥役藉詞禁令擾累民間如遇選秀女年分由八旗挑取不得采及漢人免蹈前明弊政以示限制而恤下情將此通諭知之○諭交涉事宜最爲重要現在振興庶政尤應博採所長出洋游歷人員若能於各國政治工藝潛心考究切實講求庶幾蔚爲通才足備國家任使近來各省士子留心時務多赴各國學堂肄業惟宗室八旗子弟風氣未開亟宜廣爲造就著宗人府八旗都統遴擇各旗子弟年在十五歲以上二十五歲以下志趣正大資質聰明體氣強壯者造冊開送軍機處進呈聽候派員覆覈挑選給資遣赴各國游學藉資歷練而廣見聞用副朝廷圖治育才至意○調張百熙爲吏部尙書葛寶華爲刑部尙書以呂海寰爲工部尙書陸潤庠爲左都御史朱祖謀爲禮部右侍郎○丙辰諭俞廉三奏查明安鄉等縣州縣本年被水田畝蘆洲請分別蠲緩遞緩錢漕蘆課等項一摺湖南安鄉等縣州縣本年夏間湖河泛漲低窪地畝悉被淹沒收成均形歉薄若將應徵錢漕蘆課等項照常徵收民力實有未逮加恩著照所請所有安鄉等縣成災六七八九十分各村莊暨勘不成災之武陵等縣所屬各村莊均著照勘明被災輕重情形將應徵錢漕蘆課分別蠲

緩遞緩以紓民力○諭近來各省制錢缺少不敷周轉前經福建廣東兩省鑄造銅圓輪廓精良通行市肆民間稱便近日江蘇仿照辦理亦極便利并可杜私鑄私銷之弊著沿江沿海各督撫籌款仿照卽就各該省搭鑄通行至京師制錢亦應照辦卽著福建廣東江蘇等省將所鑄銅圓趕緊各解數十萬圓投交戶部頒發行使期於利用便民以維圖法○諭劉坤一等奏參知縣交代欠款延不清解請飭拿問監追查抄備抵一摺已革江蘇候補知縣王豫熙於前署上海縣任內欠解瀏河工費銀一萬三百八十二兩零又欠解捐項等款爲數甚鉅業經奏參革職勒追現在逾限未交實屬疲玩已極著劉坤一恩壽將該革員王豫熙拿問監追並著浙江巡撫任道鎔將其原籍海鹽縣並寄居之海甯州所有家產一併嚴密查抄備抵以重庫款該部知道○諭岑春煊奏查明陽曲等廳州縣夏秋被災各屬請蠲緩新舊錢糧開單呈覽一摺山西陽曲等廳州縣當歷年積歉之後本年又復被旱被雹被水田畝受傷收成均形歉薄若將應徵錢糧照常徵收民力實有未逮加恩著照所請所有陽曲等四十三廳州縣均著照勘明被災輕重情形將應徵新舊正雜錢糧分別蠲緩遞緩以紓民力○命榮祿爲文華殿大學士王文韶爲文淵閣大學士孫家鼐爲體仁閣大學士○丁巳諭岑春煊奏山西本年續報夏秋被災各屬再懇蠲緩停展新舊錢糧等項一摺山西永濟等縣秋禾被淹被旱民情拮据若將新舊錢糧照常徵收民力實有未

速加恩著照所請將永濟陽曲平陸太原等縣新舊錢糧歸入前案一併蠲緩停展以紓民力○以那桐署外務部左侍郎○命侍讀學士朱益藩編修鄭沅在南書房行走○呂海寰奏查和蘭南洋各島開埠最早華民之往彼謀生者亦最夥而噶羅巴一島尤爲薈萃之區其屬有三十餘府寄居之華民不下大十萬人初尙優待後因迫令入籍遂致鼓噪被戕者幾及十萬人殺戮之慘暗無天日厥後苛政繁興種種凌虐擢髮難數推原其故以中國未經設立領事以保衛之也查前任出使大臣薛福成許景澄等迭經函商總理衙門暨北洋大臣兩廣總督籌商保護之法均以設立領事爲最要關鍵惟中國與各國訂立通商條約當時未悉洋情又視設立領事爲無足重輕故約內祇載各國可於中國各通商口岸設立領事未載中國可在各國口岸設立領事明文以致中國欲在各國口岸添設領事無不多方阻止雖俄續約有中國欲在俄羅斯京城或別處設立領事官亦聽中國之便德續約有凡德國各處准各國領事官駐紮者中國亦可派員駐紮中法越南條約有中國可在河內海防一處設立領事官各等語乃至今未能設立惟秘魯巴西日本墨西哥條約有彼此均可設立領事一欸中國業已擇要舉行而中國與和蘭所訂之約未經聲明和外部卽以此阻撓噶羅巴各島添設領事屢議未成職是之故臣充總理各國事務衙門章京時卽習聞之嗣於光緒二十三年欽承 簡命出使德和兩國時以此事爲念迫放洋後